



Republika e Kosovës
Republika Kosova - Republic of Kosovo
Qeveria - Vlada - Government
Ministria e Shëndetësisë
Ministarstvo Zdravstva - Ministry of Health
Zyra e Ministrit/Ured Ministra/Office of the Minister

Nr. [redacted]/2020
Datë: [redacted], 04.2020

Në mbështetje të nenit 145, pika 2 të Kushtetutës së Republikës së Kosovës, duke marrë për bazë nenet 10 dhe 11 të Ligjit nr. 06/L-113 për Organizimin dhe Funksonimin e Administratës Shtetërore dhe të Agjencive të Pavarura të Republikës së Kosovës; nenin 12 paragrafi 1.11 dhe nenin 89 të Ligjit nr.04/L-125 për Shëndetësi; nenin 8, paragrafi 1.4 dhe Shtojcën 10 paragrafi 1 të Rregullores nr.05/2020 për Fushat e Përgjegjësisë Administrative të Zyrës së Kryeministrit dhe Ministrive (19.02.2020); nenet 3, 4, 33, 41, 44, 47 dhe 53 të Ligjit nr. 02/L-109 për Parandalimin dhe Luftimin e Sëmundjeve Ngjitëse; nenet 44, 46 dhe 47 të Ligjit Nr. 05/L-031 për Procedurën e Përgjithshme Administrative; dhe nenin 27 të Ligjit Nr. 03/L-202 për Konfliktet Administrative; në zbatim të Vendimit të Qeverisë së Republikës së Kosovës Nr.01/11 datë 15.03.2020, si dhe në përputhje të plotë me Aktgjykimin e Gjykatës Kushtetuese nr. KO54/20, ministri në detyrë i Ministrisë së Shëndetësisë, nxjerr:

V E N D I M

**për parandalimin, luftimin dhe eliminimin e sëmundjes ngjitëse COVID-19
në territorin e Komunës së [redacted]**

I. Prej datës 15 prill 2020 në orën 06:00, ndalohet qarkullimi i personave fizikë jashtë shtëpive/banesave të tyre në Komunën e [redacted] përveç rasteve në vijim:

- (a) **Për personat fizikë mbi moshën 16 vjeçare** lejohet qarkullimi për furnizim me mallra të domosdoshme (ushqim dhe barna për njerëz dhe kafshë/shpezë, si dhe produkte higjienike) dhe për të kryer detyrat dhe nevojat financiare (pagesat, punët bankare), **vetëm për 1 orë e gjysmë në ditë**, sipas orarit të përcaktuar javor në bazë të shifrës së parafundit të numrit të tyre personal. Orari është i bashkëngjitur këtij vendimi (shih Aneksin 1) dhe do t'i nënshtrohet rotacionit dy herë në javë. Për shtetasit e huaj që nuk posedojnë numër personal të Republikës së Kosovës, orari i lejuar i daljes përcaktohet bazuar në shifrën e parafundit të numrit të pasaportës ose të letërnjoftimit të shtetit të huaj.
- (b) Gjatë qarkullimit të personave fizikë, **nuk lejohet shoqërimi nga askush**, përveç në tri raste:

- (1) **personat me aftësi të kufizuara**, të cilët mund të shoqërohen vetëm nga një anëtar tjetër i së njëjtës bashkësi familjare, apo nga një asistent mjekësor/shëndetësor.
 - (2) **personat nën moshën 16 vjeçare**, me kusht që të jenë të shoqëruar nga një anëtar i së njëjtës bashkësie familjare.
 - (3) **kafshët shtëpiake**, me kusht që të mbahen të lidhura në çdo kohë gjatë orarit të lejuar të daljes.
- (c) Gjatë orarit 90-minutësh të lëvizjes së lirë në bazë të numrit personal, personat fizikë mund të dalin jashtë banesave/shtëpive të tyre për të kryer ushtrime fizike. Përveç përjashtimeve në pikën (b), **nuk lejohet shoqërim nga askush gjatë kryerjes së ushtrimeve fizike.**
- (d) Për shkak të rrezikshmërisë së lartë të COVID-19 ndaj të moshuarve, **rekomandohet** që personat mbi moshën 65 vjeçare të mos dalin nga shtëpia/banesa, përveç për raste urgjente dhe kur është e domosdoshme.
- (e) Me dokument konfirmimi nga ATK EDI dhe **vetëm për të kryer nevojat e operatorëve ekonomikë apo institucioneve përkatëse**, mundësohet:
- (1) qarkullimi i lirë për operatorët ekonomikë dhe institucionet e parapara në listën e bashkëngjitur si Aneksi 2 dhe 3 të këtij vendimi.
 - (2) transporti i lirë i mallrave dhe shërbimeve për të siguruar funksionimin e zinxhirit të furnizimit — si proces që përfshin veprimet nga lënda e parë në prodhim, përpunim e shërbim gjer te transporti i produkteve, shpërndarja dhe shitja te konsumatori i fundit — për veprimtaritë e lejuara sipas Aneksit 2 të këtij vendimi.
- (f) Lejohet qarkullimi i lirë për institucionet në listën e bashkëngjitur si Aneksi 3 i këtij vendimi, **vetëm për të kryer detyrat zyrtare.**
- (g) Në raste urgjente të shëndetësisë, lejohet dalja nga shtëpia/banesa për të kërkuar trajtim mjekësor në një institucion shëndetësor.
- (h) Lejohet qarkullimi për personat fizikë në raste ku dalja nga shtëpia/banesa është e domosdoshme për t'u kujdesur për një ose më shumë të sëmurë, ose për një ose më shumë persona me aftësi të kufizuara, **vetëm nëse të sëmurët apo personat me aftësi të kufizuara nuk kanë mundësi të kujdesen për vetveten.**
- (i) Ndalimi i qarkullimit të personave fizikë jashtë shtëpive/banesave të tyre nuk zbatohet në raste të viktimave të dhunës familjare. Viktimave të dhunës familjare u lejohet të dalin nga shtëpitë/banesat e tyre për të kërkuar strehim në një lokacion alternativ.
- (j) Në raste të vdekjes, lejohet dalja nga shtëpia/banesa për të marrë pjesë në varrim, **por vetëm për familjarët e ngushtë të të ndjerit.**
- (k) Ndalohet rreptësisht dalja nga shtëpitë/banesat për çfarëdo arsye tjetër përveç për arsyet e lartcekura, duke përfshirë në këtë ndalim takime shoqërore, vizita familjare, etj.

II. Prej datës 15 prill në orën 06:00, ndalohet hyrje-dalja nga Komuna e _____ përveç në këto raste:

- (a) Me dokument konfirmimi nga ATK sistemi EDI dhe **vetëm për të kryer transportin e mallrave dhe shërbimeve për të siguruar funksionimin e zinxhirit të furnizimit** — si proces që përfshin veprimet nga lënda e parë në prodhim, përpunim e shërbim gjer te transporti i produkteve, shpërndarja dhe shitja te konsumatori i fundit — lejohet hyrje-dalja për veprimtaritë e lejuara sipas Aneksit 2 të këtij vendimi.
- (b) Me dokument konfirmimi nga ATK sistemi EDI, përveç për kryerjen e transportit të mallrave dhe shërbimeve, hyrje-dalja u lejohet gjithashtu punëtorëve të punësuar nga

operatorët ekonomikë, **përveç për zonat e shpallura nga Ministria e Shëndetësisë si vatra të përhapjes së infeksionit.**

- (c) Lejohet hyrje-dalja e bujqve dhe punonjësve të fermerëve, **përveç për zonat e shpallura nga Ministria e Shëndetësisë si vatra të përhapjes së infeksionit.** Për bujqit, për hyrje-dalje nevojiten: (i) Certifikata e Regjistrimit të Fermerit, (ii) Aneksi 1 i Certifikatës – Shënimet e Fermerit të Regjistruar dhe (iii) Letërnjoftimi.
- (d) **Vetëm për të kryer detyrat zyrtare,** lejohet hyrje-dalja për institucionet në listën e bashkëngjitur si Aneksi 3 i këtij vendimi.
- (e) Lejet për qarkullim në raste të specifikuara më sipër nga Aneksi 3 lëshohen nga MPBAP.
- (f) Në raste urgjente të shëndetësisë, lejohet hyrje-dalja për të kërkuar trajtim mjekësor në një institucion shëndetësor, por vetëm nëse ky trajtim nuk ofrohet në komunën ku ndodhet personi për të cilin kërkohet trajtim.

III. Prej datës 15 prill në orën 06:00, ndalohet qarkullimi i automjeteve në Komunën e [REDACTED], përveçse:

- (a) Me dokument konfirmimi nga ATK sistemi EDI dhe **vetëm për të kryer nevojat e operatorëve ekonomikë,** mundësohet:
 - (1) qarkullimi i automjeteve për operatorët ekonomikë dhe institucionet e parapara në listën e bashkëngjitur si Aneksi 2 dhe 3 i këtij vendimi.
 - (2) lëvizja e punëtorëve, vetëm për të shkuar në punë dhe për t'u kthyer nga puna, sipas orarit të operatorit përkatës ekonomik. Punëtori ka të drejtë të shfrytëzojë edhe veturën personale.
 - (3) transporti i lirë i mallrave dhe shërbimeve për të siguruar funksionimin e zinxhirit të furnizimit — si proces që përfshin veprimet nga lënda e parë në prodhim, përpunim e shërbim gjer te transporti i produkteve, shpërndarja dhe shitja te konsumatori i fundit — për veprimtaritë e lejuara sipas Aneksit 2 të këtij vendimi.
- (b) Orari i qarkullimit për bujqit dhe punonjësit në fermë është 06:00 – 20:00. Për bujqit, në kohën e qarkullimit nevojiten: (i) Certifikata e Regjistrimit të Fermerit, (ii) Aneksi 1 i Certifikatës – Shënimet e Fermerit të Regjistruar dhe (iii) Letërnjoftimi.
- (c) Punonjësit e fermave do të pajisen me dokument konfirmimi nga MBPZhR vetëm për të kryer nevojat e punës në fermën përkatëse.
- (d) Me leje të veçantë të qarkullimit dhe **vetëm për të kryer nevojat e institucioneve shtetërore,** lejohet qarkullimi i automjeteve për stafin esencial të këtyre institucioneve.
- (e) Lejohet qarkullimi me automjete për personat të cilët marketin/barnatoren/bankën/pikën e pagesës më të afërt e kanë më shumë se 2km larg. Në këto raste, nuk lejohet përdorimi i automjetit për të udhëtuar te ndonjë market/barnatore/bankë/pikë e pagesës përveç atij më të afërt.
- (f) **Vetëm për të kryer detyrat zyrtare,** lejohet qarkullimi i automjeteve për institucionet në listën e bashkëngjitur si Aneksi 3 i këtij vendimi.
- (g) Lejet për qarkullim në raste të specifikuara më sipër nga Aneksi 3 lëshohen nga MPBAP.
- (h) Lejohet qarkullimi i automjeteve për personat me aftësi fizike të kufizuara që e bëjnë të domosdoshëm përdorimin e automjeteve.
- (i) Lejohet përdorimi i automjetit për të udhëtuar te një institucion shëndetësor për të kërkuar trajtim.
- (j) Në raste të vdekjes, lejohet përdorimi i automjetit për të marrë pjesë në varrim, **por vetëm për familjarët e ngushtë të të ndjerit.**

- (k) **Përveç për arsyt e përcaktuar në pikën I, nuk lejohet më shumë se dy persona në një automjet.**
- (l) Përjashtimisht, ekipet e mediave të cilat punojnë në terren lejohen të kenë deri në 3 persona në automjet me kusht që të 3 pasagjerët të kenë maskë speciale FFP2 plus dorëza të vendosura.

IV. Gjatë qarkullimit të lejueshëm sipas përjashtimeve të parashikuara në pikat I, II dhe III më lart, personat fizikë obligohen:

- (a) të mbajnë të mbuluara vetëm gojën dhe hundën, përmes maskës, shallit, apo ndonjë mbulese tjetër;
- (b) në çdo kohë, të ruajnë distancë prej dy metrash nga persona të tjerë.

V. Mosrespektimi i masave të përcaktuara në këtë vendim konsiderohet, sipas ligjit, si kundërvajtje administrative dhe dënohet me gjobë, prej 1,000 Euro deri në 2.000 Euro për personat fizikë dhe prej 3,000 Euro deri në 8.000 Euro për personat juridikë, ndërsa personi përgjegjës i personit juridik dënohet prej 500 Euro deri me 1,500 Euro. Në përputhje me ligj, gjobat shqiptohen nga Inspektorati kompetent.

VI. Vendimi hyn në fuqi ditën e nënshkrimit dhe i njëjti vlen deri më **4 maj 2020**. Me hyrjen në fuqi të këtij Vendimi, shfuqizohet çdo dispozitë e mëparshme që bie në kundërshtim me dispozitat e këtij Vendimi.

VII. **Ky vendim do të rishqyrtohet** jo më vonë se **30 prill 2020**, në konsultim me Institutin Kombëtar të Shëndetit Publik, ekspertët dhe ministritë e tjera të linjës, për të vlerësuar efikasitetin dhe domosdoshmërinë e masave të përcaktuara, si dhe për të vendosur për vazhdimin ose jo të masave përkatëse.

VIII. Përveç pikës VI dhe VII, Ministri i Shëndetësisë do ta ri-analizojë situatën epidemiologjike çdo ditë dhe në lidhje me secilën pikë të lartcekur dhe, pas konsultave paraprake, mund të ndryshojë, plotësojë apo shfuqizojë masat e përcaktuara.

ARSYETIM

Më 11.03.2020, duke miratuar kërkesën e Ministrisë së Shëndetësisë, Qeveria e Republikës së Kosovës ka nxjerrë vendimin Nr. 01/07, përmes të cilit janë marrë masat e para për parandalimin dhe luftimin e infeksionit COVID-19. Pas konfirmimit të rasteve të para të personave të infektuar, në përputhje me rekomandimet e IKShPK, Ministria ka kërkuar nga Qeveria nxjerrjen e vendimeve të tjera përmes të cilave janë marrë masa shtesë për parandalimin dhe luftimin e sëmundjes COVID-19.

Më 23.03.2020, Qeveria e Republikës së Kosovës ka nxjerrë vendimin Nr. 01/15 përmes të cilit janë marrë masat e domosdoshme për mbrojtjen e jetës dhe shëndetit të qytetarëve në tërë territorin e Republikës së Kosovës.

Më 31.03.2020, Gjykata Kushtetuese e Republikës së Kosovës ka njoftuar opinionin se pas kontestimit të vendimit të Qeverisë Nr. 01/15 nga Presidenti i Republikës së Kosovës, ka miratuar kërkesën e të njëjtit dhe ka shpallur të pavlefshëm vendimin e kontestuar. Mirëpo në të njëjtin vendim, Gjykata Kushtetuese ka ritheksuar se Ministria e Shëndetësisë vazhdon të jetë e autorizuar që të nxjerr vendime me qëllim të parandalimit dhe luftimit të sëmundjes COVID-19, për aq sa është e

autorizuar përmes Ligjit nr. 02/L-109 për Luftimin dhe Parandalimin e Sëmundjeve Ngjitëse dhe Ligjit nr. 04/L-125 për Shëndetësi. Sipas nenit 47.1 të Ligjit për Luftimin dhe Parandalimin e Sëmundjeve Ngjitëse, “Ministria e Shëndetësisë është kompetente për zbatimin e këtij ligji dhe për miratimin e dispozitave të parapara me të”.

Sipas nenit 41.2 të Ligjit nr. 02/L-109 për Luftimin dhe Parandalimin e Sëmundjeve Ngjitëse, për ta parandaluar futjen dhe përhapjen e sëmundjeve ngjitëse në tërë vendin, Ministria e Shëndetësisë është e autorizuar për “ndalimin e qarkullimit në rajonet e infektuara ose drejtpërsëdrejti të rrezikuara”. Në datën 12.04.2020, IKShPK i propozoi Ministrisë së Shëndetësisë marrjen e masave të theksuara në dispozitivin e këtij vendimi për komunën e [REDAKTUAR], për shkak se IKShPK konsideron se infeksioni është përhapur në atë komunë apo e njëjta konsiderohet drejtpërsëdrejti e rrezikuar. Me qëllim që Ministria e Shëndetësisë t’i përmbushë obligimet ligjore për mbrojtjen e jetës dhe shëndetit të qytetarëve i aprovoi propozimet e IKShPK sikurse në dispozitiv të këtij vendimi.

Prandaj, në përputhje me gjendjen faktike dhe juridike të përshkruar në këtë arsyetim, Ministri i Shëndetësisë vendosi si në dispozitiv.

Këshilla juridike:

*Pala e pakënaqur mund të ushtrojë
padi të konfliktit administrativ
në Gjykatën Themelore në Prishtinë
Departamentin për Çështje Administrative
në afat prej 30 ditësh pas publikimit të këtij vendimi.*

Arben Vitia

Ministër në detyrë i Shëndetësisë

Vendimi iu dërgohet:

- Kryeministrit të Republikës së Kosovës;
- Ministrisë së Punëve të Brendshme dhe Administratës Publike;
- Sekretarit të Përgjithshëm MSh,
- Departamentit Ligjor MSh,
- IKSHPK-së;
- Kryetarit/es të Komunës;
- Policisë së Kosovës;
- Inspektoratit sanitar;
- Qendrës operative emergjente në MSh;
- Arkivit të MSh.